

■ COLUMNA

Davart basegns ed influenza

DA FLAVIA HOBI

Mintgatant ma dumond jau quant fitg che nus ans laschain influenzar dad autra glieud. Jau admir carstgauns che san exact tge ch'els vulan e tge betg. Per exempel quests che san schon dapi lur uffanza tge professiun ch'els vulan far in di. Jau crai, emprender da betg laschar s'influzar memia fitg dals auters è insatge enorm impurtant. Jau stoss dir since-ramain ch'jau hai sco matatscha ma laschè influenzar bler memia fitg. Per cletg hai jau pudì midar quai per gronda part. Ma per far quai hai jau era stuì emprender da tadlar sin mai e cunzunt da chattar ora tge ch'jau vi – e tge eba betg.

Segir dependa l'influenza dals carstgauns era fitg da la relaziun ch'ins ha tar els. Senza dubi è questa influenza per gronda part era buna. Pli datiers ch'ina persuna è ad ins, pli serius prendan ins in cussegl, ina critica u ina proposta da questa. Era sch'ins vul l'emprim mument forse betg admetter quai. Cussegl, critica e propostas na fan mai donn – ma tuttina ston ins oravant tut star sez davos sias decisiuns e tge ch'ins fa or da tgai resta lura en ils agens mauns. Jau na vi betg dir ch'ins duess vegnir egoist. Bun è probabel ina maschaida tranter



resguardar ils agens basegns, ma era quests dal conturn. Quai n'è segir betg adina uschè simpel. Forsa èsi mintgatant er ina discrepanza tranter sa giustifitgar, sa profilar e resguardar ils basegns da tuttas varts. Zuppentar cussegls, criticas e propostas totalmain na fiss segir era betg il meglier – a la fin èsi gea mo manegià bain.

Cler, ins sa dat auter sch'ins ha exact en il chau tge ch'ins vul e quai anc cun il patratg da trair tras quai en mintga cas. Ins fa pli fitg encunter, ins proclamescha forse dapli e probabel ch'ins discussiuna empè da dir gea ed amen. Ma exact quai munta ch'ins è sincer. Betg mo visavi sasez, mabain surtut era visavi ses conturn. Perquai èsi er impurtant ch'ins po discussiunar e sa dispartar – saja quai en famiglia u en relaziun cun amis ed amias. Adina far sco sche tut fiss bun fiss numnada-

main betg adina undraivel. Quai savain nus tuts. Lura runan ins cun ins adina dapli e dapli chaussas senza ch'ins realisescha anc quai. Ma era sche mintgin po star ora different bler sto mintga ventil pli baud u pli tard pudair laschar ora l'aria. Stranglar giuaden chaussas po funcziunar in temp, forse in pèr onns u schizunt decennis. Ma jau poss metter avant che pli ditg che quai è il cas, pli ditg dovra il ventil fin ch'el è vid. Plinavant n'èsi segir betg empernaivel, pertge tut quest'aria evoca tscher-tas regurdientschas. E sch'i fissan stadas experientschas bellas avess ins segir gi il basegn da parter questas e betg da magliar en ellas en sasez.

Quai na duess betg esser in text da mussavia. I èn plitost patratgs che duessan animar. Animar da forse vesair en chaussas malempernaivlas insatge bun, insatge positiv. Pia pon mintga dispita e discordia avoir ina raschun ch'è buna ed impurtanta da savair. Uschia han ins la schanza dad emprender or da mintga situaziun, or da mintga crisa e daver-tar pli fermes e pli segirs. Plinavant èn ins preparads per la proxima sfida, forse era per in'otra crisa – ma quai cun la savida ch'ins dumogna ella. Tut tenor il motto «tge che na bitta enturn mai, fa mai pli ferm.»